

Шатр—культурн наадн

Мана Советск Союзд шатрин чинр дегд ик. Советск правительств болн мана оln-амтн шатриг гүн ухата болн культурн наадн, кен-чигн куунд зормг седкл, омг, тогтун бәрмджтә бәәдл болн түрү үзгдх саамд тер түрүг хагьлдз чадг уха өгдг наадн гидж тоолна.

Иим ик чинртә, оln-амтн дурлдж наадг сәәхн наадн мана таньгьчд ямр кевәр оньган өгдв, нег үлү таньгьчин хотл балгьсн—Элстд? Энүнә хәрүд: му,—гидж келдж болхмн.

Мана Элстд шатрт болн дөбвд дурта, билгтә оln наадачнр бәәнә. Болв иим оln, сән билгтә наадачнриг хурадж бүрдәгьәд, теднә билгинь улм өбдлүлхин төлә ноолдвр күн кехш. Элст балгьсна физкультурин болн спортин комитетин ахлач үр Гайворонский эн төрт тас ухагьан өгхш. Терүнә хаджуднь бәәсн таньгьчин физкультурин болн спортин комитетин ахлач үр Гучинов эн төриг ухананнь өнцгт авхш. Эн төрт шишлнь орлцх зөвтә учебно-спортивн отделин толгьач үр Зундоевин тускар нам үг үрәгьәд керг уга, эн төрт биш, наадк оln-зүсн көдлмштән күч-күрч чадхшв гинә.

Элстд разрядтә келү шатрч болн дөбвч бәәхинь ода чигн

балгьсна комитет тоолдж авад уга. Эн то эркән уга кергтә болх зөвтә. Би бас шатрчв, дөбвчв. Тер бийм, ода чигн балгьсна комитетд тоод зогсад угав, тоод зогстн гидж зарлхш.

Элст балгьснд болн райодт чигн разрядтә келү шатрч болн дөбвч бәәхинь, шишлнь зар тәвәд тоогьинь авх кергтә. Энүнә дару шатрчрин болн дөбвчнрин разрядинь өбдлүлхин төлә, дөрвдгчәс гурвдгчур, гурвдгчәс хойрдгчур, хойрдгчәс негдгч разрядүр орулх маргьа кех кергтә.

Болв иим наад бүрдәхләрн, урдаснь зура белләд, девснъ-девснъгәрнь кедгәр кехмн. Шидр балгьсна комитет шатрчнр хурагьад хойрдгч разрядәс негдгчүр орулхар наад бүрдәв. Тер наадн белдврн көдлмш муугьар кесн учрар, хойр-гурв цуцрад, ашднь тас тарад хуурв.

Иим муугьар наад бүрдәснд кен гемтәв? Балгьсна комитет, нег үлү терүнә ахлач үр Гайворонский гемтә.

Таньгьчин болн балгьсна физкультурин болн спортин комитетәс оln шатрчнр болн дөбвчнр иигдж некджәнә: эн ик чинртә, оln-амтн дурн-седклән өгч наадг наадн оньган өгтн.